

四庫全書

集部

欽定四庫全書

天馬山房遺稿卷六

明 朱泚 撰

贊

守素贊

不腴其膚而長其軀不裁其冠而華其裾其行于其  
止遽遽謝長輓於湖海守先人之田廬既娛情於情話  
亦放意於琴書不闕寵辱而齊毀譽蒼蒼天馬之麓莽

莽凌雲之隅每孤往而徑造恣倚徙而踟躕撫孤石之  
嵯峨蔭佳樹之扶疎噫斯人也蓋庶幾於知止知足之  
戒其視夫貪得冒利老而不悔者其人之賢不肖何如  
耶

方可吾畫像贊

盎乎其春融凝乎其山峙此工之所可傳然得其似者  
耳苟非天理事不苟可吾心此公之所自許而得其深  
也與

一厓江先生贊

鏗然金石之聲馥然芝蘭之味翹然白屋之英偉矣青  
雲之器偃蹇半生蹉跎十試氣帶烟霞衣製荷芰然而  
髮未易玄貌不加瘁將萬物之利鈍乎有時抑至人分  
窮通一視昔賢有云至樂莫如讀書至要莫如教子公  
於斯言庶幾無愧

東渠贊二首

我而冠整而裾其容肅其貌舒禮度閑都言笑怡愉誼

克睦于其家行不愧于其閭壯遊湖海之間觀風梁宋  
之墟今將老且倦矣已定歸計爰息其廬平步遠村俯  
濯清渠日涉園圃春事留畚杯酒親朋敦平生之夙好  
簡編魚蠹理先子之遺書庶幾以淑其身以教其子以  
不失古人為善之意俟天命之何如

又

有楚其服有嵒其中登我堂序儼如大賓予揖而問之  
曰君為誰向行文峰之下遇一偉丈夫焉佳其風儀甚

都禮度不俗心矍然敬之君其若人耶又申而問之曰  
君為誰吾聞侯山之下有一偉丈夫焉得其靜退之風  
孝弟之美心歆然愛之君其若人耶舒眉端視却立平  
身笑而不答其意相親

題文峰桂影圖

居然泉石愛此林丘皓魄正午踈影橫秋六合氣澄萬  
籟聲收爾乃卷書罷讀欽視凝眸充乎理足浩若天遊  
神清不寐意去猶留興言高咏緬想前修益其與吟風

弄月之趣越百世而同流

牧植劉先生分教平海有賦歸之志以小影索題

援筆爲此

晦于清漳遨遊巨區藤蓑笠牧植自娛雋于澤宮翺  
翔天衢正襟肅容師席是居官微而氣無所慙道豐而  
貌不加腴斯人也吾占其眉間之黃色其得思脫冠裳  
之羈梏而與得反其初服也與

字箴

汪生構名箴

古人之生父命之名中世起義或自友生我與尊翁忝  
得科第其在後昆則有世契爾方髫髻待官來莆我時  
過從獲觀坐隅頭角昂藏神采自異吾兒顓蒙馭駘望  
驥而翁謂我渠名子為字當從未諸姪是隨謹按字書  
命爾曰構而翁得子以綿世肖北人耕岱謂之構田能  
無莽鹵乃亦有年為學與農理同事異不植將落勤則  
不匱而翁竒好富哉詩書曷貽爾後時維畱畱慎爾勉



旃不替朝夕勿謂來年勿謂來日簡編膏火能不憚煩  
譬彼力穡其獲實繁窮深入微厚積薄發溢為文章樹  
為勲伐聞者竦敬嗟然斯名垂百千年炳炳丹青

方子應貴字訓

將仕郎若亭方君筮賓冠其冢子夢瓊字之應貴以  
書來曰願有以訓之以相其成也淞親且故又重方  
子之才也故輒為韻語數章陳之禮筵庸致愛助之  
意

熊羆之祥兆於夢寐吉夢惟瓊神錫爾類定爾佳名字  
爾應貴奉以周旋庶幾罔愧

古之君子貴玉賤珉世之具眼燕石混真燦燦瓊枝惟  
席上珍萬代是寶永無溜磷

玉之所貴匪以厥德厥德孔嘉君子是則

闕

今

儀令色鳴鳩淑人正是四國

萬鎡之寶付諸良工薦以他石湔磈磨礪維茲質美務  
學名通古有明訓蒙養聖功

玉蘊于石不耀其光至寶用世誼不終藏為珣為璉為珪為璋薦之上帝升彼巖廊

君子貴玉必慎所操鞠躬戰慄如御風濤人生所恃不在門高立比升天墜易燎毛

宗門善慶富彼瓊英業傳詩禮世襲簪纓禮師古人穆穆佳聲庶其可作抑齋先生

噫惟崖翁耄期稱道歸然靈光為邦大老典則猶存淵源可考應貴易哉惟善為寶

家有嚴君蒸蒸孝友嗣德紹休不在爾後嘉止甫臨歲  
冠加首勗哉應貴永介眉壽

希正字箴

友人張師中氏冠其弟大權執弁之役辱委命焉共  
訂其字請為之說泐不文隳括古辭輒為韻語雖乏  
威儀之攝亦庶以盡朋友之責焉爾

冠而字之是謂成人情彼周道式愧嘉賓字系於名義  
以名起假是呼號日警於耳惟先君子錫爾令名厥名

維何大權是稱諷斯佳辰爰告爾字厥字維何曰希正  
氏天下之理有經有權錯綜運化惟所當然經所不及  
賴權攸濟權以濟經道斯無弊權而得正於經曷殊不  
主故常獨與道俱惟權之趨譎張戾裂乃拂于常首尾  
衡決經以立體權以隨時未可與立安能及茲古聖從  
心動與理會君子慎動行可無悔吾黨下士慄慄小心  
揆世應物履薄臨深大猷是經權亦時用低昂往來稱  
停輕重罔小不事惟正為希庶幾寡過君子攸歸若考

終身溫恭周慎尚有典刑以迪來胤伯也日邁克紹厥家靜養于蒙無俾奇衰萬里悠塗攻車發軔範我馳驅勗哉希正

周氏讓之字說

見虛周君別且十年矣近自金壇以書來曰小子丕時將加元服家君字之曰讓之願吾子有以詔以勗其成也荆鄙人無能為役粵在遠地無所於辭乃為說以諭之夫讓之名若字非取於書召奭之所云乎以聖賢之

言經書之旨為之襲名若字愛之深者期之遠也雖然  
功成身退施諸盛滿之時甫冠之士固有所未及然聖  
人之言通遍周匝善取益者固無乎不宜也夫義利並  
行而私心易逞勝負角立而克己為難故古人生子自  
其能言始教之讓既復入於小學以從事於灑掃進退  
應對守其毫釐尺寸以涵養其善端消磨其客氣使之  
低首下心正容謹節日入於規矩準繩而不自知至於  
終身大訓亦未嘗有越乎此者蓋謙尊而光而慮以下

人固邦家之所必達也蓋將使之應世接物恒存夫收  
檢畏慎歆然不足之心自卑尊人先彼後已而一毫猛  
奮矯厲上人凌物之意無所入於其中是其德性謙和  
氣象廣大知聞益富道德益崇爵位益峻而心益謙降  
抑損當時稱其賢後世望其光如書之所載周召二公  
固其人也讓之生長名門家世簪笏而諸父弟昆珠聯  
玉映讓之又有雋才駸駸嚮用固周氏之丕時也昔之  
慈母有云惟患其不能屈不患其不能伸讓之義固周



生終身之弦韋也見虛居家以孝友聞施於有政所以式穀似之者固必有道矣重辱遠意書以代祝規以申忠告之誼云爾

辯

天妃辯

闕

鄉約

誓禁屠牛鄉約

君子在朝則美政在野則美俗風俗薄惡非吾士夫之

責哉吾鄉科甲輝聯人物富厚屋宇之盛甲於海邦廉  
恥之風傳諸故老民生既庶人心靡齊間有慣習屠牛  
陰通盜賊行克逞暴作過為非凡有失盜之家便來此  
中尋覓叫號喧鬧無日無之雞犬為之不寧鄉里被其  
污穢今逢府主雲泉吳老先生嚴加禁約吾輩視此寧  
無覲顏夫牛出力耕作殺而食之誠為殘忍況夫盜而  
得者鈎其舌以出穴錐其肉以速行或殺母及子或剖  
腹墜胎慘毒之形不可名狀吾輩具知其情買而食之

充類至義之盡是亦賊而已矣夫水名貪泉志士不飲  
況親於其身為不善者乎今鄉中父兄子弟同興善心  
共立約會就於天日之下重發誓願除老疾暫食之外  
斷絕此味如有私買其肉及焙乾者烹之於鍋嘗之於  
口饋之於人者天神誅殛使身生惡瘡家遭凶疫滅姓  
墜氏以償此牛之命以雪貧民之冤夫山海錯百品  
千般俱足養生奚須於此亦有置客買諸他處欲清弊  
源宜併禁絕如有故犯并宜遭譴今立此簿與各人的

筆自書名姓歲時朔望告於里社呈於鄉衆期於共守  
以還淳風如有習惡不悛怙終無忌此真口體小人穿  
窬下類鄉人共舉不與並齒謹告十四年乙未秋約

申禁鄉屠牛鄉約

吾鄉士夫耆宿前年禁約屠牛漸成美俗吳府尊先生  
就明倫堂上對衆稱說洗舊日惡名夫牛出力耕作殺  
而烹之食者甚美死者甚苦有傷陰陽遺累子孫禁之  
數年待客養生未嘗闕乏夫事易忘人心易怠近聞鄉

間漸爾開禁家中食用多買此物以致外鄉賊徒橫挑此物入境公然無畏亦甚可惡前年指天共誓凡以牛肉入口煮之於鍋饋之於人者身生惡瘡家罹橫禍以償此牛之命今再申誓如前倘有不願入約者姑亦聽之古人云父母愛之鄉人稱之諸君何不為君子吾輩父祖子孫世居于此共相觀勉以成善俗甚幸十九年八月申誓

申禁屠牛小帖

屠牛之禁行已十年風俗齊同遠近安帖各家父兄所  
宜訓飭子弟鈴束童僕毋更復為此事以啓惡業之端  
夫治生百方向取此事養生百味何須此物君子能舍  
之不用小人自止而不為口體之奉甚微風俗所關甚  
大嘉與吾黨共守前盟二十五年秋九月申約

婚啓

代洪西淙回顧頤齋啓

江湖老大慶逢弧矢之辰天地清明氣協陰陽之候草

堂背郭勝事偏多稚子牽衣弱翁饒笑恭惟執事鼎鉉  
古意瑚璉時珍敬歷天曹望日華分咫尺典司文憲肅  
風紀於兩臺物望正隆家居未穩如僕者馳驅之力倦  
矣冒君寵而許歸來進取之心淡然慕古賢而知止足  
念諸郎之生太晚貽迺翁之債方殷膝下第三小頑名  
曰應屏日蒙許以令愛為之結婚利可斷金緣諧種玉  
南轅北轍頻牽杜若之雲蘭水壺山未爽梅花之約令  
辰納幣薄物將勤此子生已十齡成人近在數載賴天

之福假我以年治百兩迓季女以歸登高堂拜尊章之  
壽兩家各生子占協鳳凰百歲以為期慶流苗裔端拜  
君賜深領年情將葵藿之誠春雲一幅望瑤華之報終  
日七襄

代洪西淙聘方西臯啓

城南燈火涼入新秋天上仙槎光分七夕恭陳盛禮喜  
際佳時伏惟令凡大侍御霽峰尊親家老先生壺標真  
氣海國精英振風紀於朝端霜清鐵筆作文章之司命



鑑徹冰壺僕邈在下風深懷仰斗向承雅意重結良緣  
以第四令姪女韜櫝之姿為第二小兒子應垣之配開  
堂耕壩近依瀛水芳隣問道具茨遠隔蓬山雲氣春融

闕

池刷鳳毛恭惟尊親老先生顥顥昂昂世載魁傑

磊磊落落人服高明愛讀孟子書上下老蘇之氣格聯  
登進士第科名大宋之後先禮樂春容勲庸特達施於  
有政孝友而親其親豈無他人兄弟之子猶子矧令姪  
應直大舅掄魁天生偉器穎脫凡流霜刃未發劍氣寒

星斗白玉猶在璞色照崑崙加以老叔之薰陶遂為清  
時之雋彥此古人有賢父兄之樂而執事以慰伯氏之  
心者也僕國恩未報隱趣甚濃翹企兒輩之成黽勉箕  
裘之紹吉朝納幣筐承不腆之儀獻歲迓輪疇錫宜家  
之慶端拜我公之賜大興洪氏之門敬拂霞箋榮祈電  
矚

與稚孫堯陳聘張守素孫女啓

溯與執事生同梓里世結姻婭蒲柳年華後公乎一歲

芝蘭臭味同予者何人少小交遊庶幾終始歸耕三十  
載校雨量晴平生一片心如膠與漆非徒笑言以取下  
雅惟道誼之相親肆令郎器量不凡情誼夙著與小兒  
子熙春念迺父百年之深交締二姓無窮之夙好許以  
令孫女士作對次稚孫堯陳指授于庭闈僉謀之昆玉  
嫁娶重母黨隆古已然匹配自天緣百神所相共深慶  
幸曷旣名言明公世為善人邦稱長者嚮用箕疇全福  
嘉與姊氏齊眉四世同春惟天從欲滿堂和氣為時所

欽測故態踈狂老懷蕭索摩挲老眼所慰意者此孫依  
托高門或乘龍於他日諏辰繫臂盥手緘辭萬里青天  
羨諸郎之健翮五花紫誥賁二老之遐齡

上梁文

自構

一經獨抱遠承祖父之遺萬里生還重拜君王之賜家  
存四壁住過半生三徑無資老興不忘松菊一丘新買  
早棲自此鷁鷁累代墳林近齊眉睫漫因人而成事聊

拓舊以為新脉接沙堤有小橋流水廣野平蕪之勝秀  
鍾天馬盡長松美石浮嵐紫翠之奇易可登臨偏宜農  
圃堂奧之上足怡慈母懽顏俎豆其間便為太祝廳事  
門無俗客庭植佳花春日舒遲覺琴書之有味人生行  
樂須富貴兮何時爰著新文以華盛舉

拋梁東簾捲千山海日紅屋上青松高百尺晚來翠色  
更龍蔥

拋梁西庭樹新雛羽翼齊翻得少陵詩句好碧梧枝老

鳳凰棲

拋梁南新結茅齋寄蔚藍儘放明堂寬百畝長饒春雨  
種宜男

拋梁北主人本是金門客回天一疏早歸來拂枕清泉  
漱寒石

拋梁上古寺凌雲樓閣壯酌月須傾綠玉尊撐天不放  
青藜杖

拋梁下門外車音多長者八荒疆界本來寬何必高門

容駟馬

伏願上梁之後書香種種世德繩繩家慶壽康真樂真  
浮三釜外國恩頒洞長安長望五雲邊

代洪西淙作

郎曹京輔清銜長係於日邊漲海炎方匹馬半行乎天  
下逝當委質何敢言家年力始衰遂上封章之請聖恩  
甚渥不違高尚之心溫旨許歸錦衣就第便可耕灞澠  
韓昌黎未踐前言於此巢雲松李謫仙果諧夙願睠茲

黃石來自青山掛河漢於窗櫺去天咫尺俯林埔于几  
席在水中央谷迴而川夷風和而俗厚固擇仁之所宜  
處亦有數存乎其間地秘天藏以至於今日龜從筮吉  
而贊以諸公迺拓新基爰開壯觀奉安誥敕昭回雲漢  
之章妥侑宗禋修明俎豆之事周廬以處宅眷別館而  
肅嘉賓金石在庭盡道是山中開府英雄回首不妨作  
地上行仙所斥俸金之餘皆出朝廷之賜情同臣甫依  
北斗以望京華詩和淵明居南村而愛其宅諏日月之



上吉舉梁棟以中升閭里懽騰山川增色愛莫助之庸  
陳不腆之辭喜可知也大發滿堂之笑留為故事傳諸  
無窮

東 江上羣山碧玉峰五色樓臺成海氣九天組練灑  
流淙

西 閨苑瀛洲路不迷廣設雲闌闕野馬高憑日觀聽  
天雞

南 瑞靄乾坤一氣涵何似鴻濛初未判渾然太極尚

含三

北  
銀燭朝天明紫陌  
鷓鴣長聯玉笋班  
衣冠尚帶爐  
烟色

上  
清風今古誰多讓  
漢朝京兆祿千鍾  
疏傳都門直  
百兩

下  
裴相歸來營綠野  
漁父間尋鷗鷺磯  
隣翁共醉粉  
榆社

伏願上梁之後郎君成立家室和平世沐皇恩封祖父

母福緣善慶貽爾子孫子孫移孝為忠承家報國五雲  
深處老臣稽首祝堯年千里來龍旺氣鍾靈蕃國族

代王筆峰作

兄弟守先人之廬百年桑梓天地秘此丘之勝五色烟  
霞發舒萬古之精英開創大夫之家廟鄉先生沒祭於  
社長宜血食人間丈夫子道顯其親固已名揚海內禮  
宜專祀事所當先邦有善人衆推耆德躬行孝弟道既  
洽於周親質任寬平化自薰於晉鄙橘園小隱雲水閒

情殷齒印蒼苔雨淋舊跡書聲在深竹夢憶兒時追昔  
平日父子之懽想見在天靈燕之聚敬敦夙好爰拓新  
規面勢孔陽拜東皇兮太乙藩籬盡徹納灝氣於無倪  
三陽水曲而入懷五侯山宛若負宸蔚哉堪輿之勝稱  
夫廟貌之華要垂久遠規模不作尋常家素寬弘部署  
高大門牆堂鋪俎豆之筵左右秩秩道存禮樂之美文  
質彬彬具歲時蠶洗之供為行人瞻拜之便粵稽潛德  
備載誥辭帝王之文天為經而地為緯鬼神所相水增

闕而山增高若揭日月而行永作江山之鎮凡拜前弟  
拜後肇祀于今子當穆孫當昭孝誠不匱事邁天人之  
會辰逢日月之良試援筆而成文助拋梁之喝采做四  
六體和金春玉應之音垂億萬年見孝子仁人之意

東海上千峰與萬峰縹緲應聯龍伯國純麗還見古  
人風

西一家通籍在金閨神州赤縣皆清秩翠栢蒼梧有  
舊題

南峭壁攢峰擁翠嵐化日博山香裊裊真仙上界府

潭潭

北景物天然畫不得玉樹溟淥碧海雲瑣窗高掛蒼

霞色

上五侯峰高八千丈杜陵老子秋興豪彩筆昔曾干

氣象

下錦園先生富風雅清時郊野鳴鳳鸞千載河圖出

龍馬

伏願上梁之後山君川后共護先靈千子萬孫果符舊  
識金闕下承恩許老天賜平安青雲路回首有人世傳  
袍笏無驕無傲效順效忠君父深恩尚夙夜不忘所自  
春秋肆祀與天地相為無窮


筆峰謝啓

附

承賜雄文真見如椽之筆來朝高誦大為隆棟之光先  
廟啓文明星躔奎壁鈞天在咫尺樂奏簫韶佑我後人  
知親賢之有自傳之百世斯文獻之足徵履齒蒼苔恍

乎如見書聲深竹涕忽潛然惟執事言啓予心致其存  
著庶先君神遊此地慰我思成愧感何如銘刻無已元  
兄季弟相期永世以對揚千子萬孫敢不拜嘉於頌禱  
俛斯慙陋曼碩何稱張老夫辭輪奐徒美豈若丈人文  
力愈出愈奇况兼大雅訓詞有規有頌謹百拜而稽首  
未罄謝私試載筆而陳辭附報來使





天馬山房遺稿卷六

欽定四庫全書

集部

天馬山房遺稿卷七

詳校官給事中臣王鍾健

中書<sub>臣</sub>劉源溥覆勘

總校官庶吉士<sub>臣</sub>朱鈐

校對官中書<sub>臣</sub>張曾效

謄錄監生<sub>臣</sub>趙廷璋

欽定四庫全書

天馬山房遺稿卷七

明 朱泚 撰

賦

天馬山賦

井序

壺公蒲鎮山也東分一枝屏翰海上列為五侯半落  
天表復折而西行隱見起伏且數千里結為文峰端  
偉秀拔飛動不居有天馬行空之勢而首足尾鬣色

色完具不可繫維余為之定名天馬山居暇日因為之賦世有九方臯者索諸牝牡驪黃之外當自得之何是物之神雋羌捷業而騰凌離埃壒之混濁憑豐隆而上征遡金天之浩蕩簪玉宇之崢嶸按圖經而索故吾不知其所以為名而其為物也氣吐青煙目懸皎日尾掃攢林足踏礚石以鈎陳為韁維雷霆為鞭策雲霞為鞍韉江海為槽枥動隨氣機行無轍跡投足而安唯意所適廼者從天而下既佶且閒騰踏乎象外蹤浪乎

人間發神光之炯炯灑汗血之斑斑朝發崑崙之巔暮  
抵祝融之境浮巨浸之渺瀰驚遐陬之修永閃走電之  
遺光歛狂飈而先逞孰氣力之可任夙造化之所秉行  
若委蛇進不暴猛越嶺徼破閩荒望莆口過遊洋擘八  
壺之右派筵五侯於上蒼翳若木映扶桑凌溟海而飛  
渡觀初曜之景光爾乃駐金驂停玉步靡然東馳忽焉  
西顧行行且止遲遲不去挹穀城之仙風愛沙堤之煙  
樹擷錦園之芳蕤濯銀塘之橫素島嶼明沒滄桑朝暮

爾來八萬六千歲於茲矣。纏井絡殿坤維仰抹晴昊。炙背冬曦。吸寥天之爽氣。饜九土之華滋。矯矯雲龍之勢。濯濯君子之儀。使仰之者起敬。而翫之者忘疲。至若廣壑。噓煙朔野。振吹天地。倏起風雨。驟至爾乃奮迅踴躍。怒張噴唳。磔毛蜩興。嘶鳴海沸。虎豹望之辟易。鯨鯢聞之震悸。居人為之迷方。行者不敢仰視。昔者河圖示兆。候日開祥。庖羲作易。伊祁開唐。運丁熙皞之會。位協東南之陽。宜其鍾為人物。洩為文章。珠璣璀璨。金薤琳琅。

掉鞅乎詞苑振步乎周行藻繪殷皞黼黻舜裳其靈異  
徵應有如此者若夫驂騑紫燕腰褭駉駉來月氏之重  
譯產渥洼之淵水圖畫傳觀歌聲載起顧盼光榮服御  
華侈豈徒慕夫名高亦有稱於德美然而道非無方日  
惟千里而其名係于天者顧若是而已乎若夫雲閑之  
駿天駟之駒脣於無極產於太初亘萬古而不息行六  
合而有餘將以殖琬琰載璠璣負金匱之璽發玉檢之  
書服太乙之葆輅駕上帝之采輿乘風馭氣周流於瀕

洞廣莫之野吾又安知其所如也

如川小賦

朝登兮嵩丘俯瞰兮川流橫遙天兮匹練浮爽氣兮九  
秋迺若曳長河下碧落瀉天漿衍地絡千緒滌迴萬瀨  
噴薄閱今古兮焉窮滙滄溟兮一壑漱若木之華津浴  
朝暉兮輝霍有美人兮水一方灑清風兮咏滄浪愛雲  
水之微茫遊神於鴻濛之始寓目於昭曠之鄉屣脫蹄  
涔之污濁逝與造物兮相忘



五言古詩

寒宵步月

明月不可負良宵亦可憐  
暮夜無招尋獨行芳澗邊  
月色照我背月影在我前  
踏月弄清影心賞方悠然

閒愛清宵長老畏白日速  
羲和無停鞭流光雙轉轂  
餘生知幾何撫景胡不樂  
蝸涎足自濡人心苦不足  
良宵成獨遊皓月當秉燭

雞犬無一喧寒色四郊靜  
東峰青松枝高卧白玉鏡  
仰

觀天無河屋角橫斗柄寂寥靡所歡清虛愜情性商頌  
有遺音琅然發孤咏

穠稹寒未收草根響蟋蟀寒月何太清耿耿照毛髮轉  
令山色幽愛此溪光滑夜深風露涼山人老皮骨平生  
不能飲負彼杯中物

娟娟昨夜月今宵看已圓待得明宵見宿昔定殊觀月  
明有圓缺世事襍悲歡良時那可擲徘徊清夜闌

攀折河邊柳還渡柳邊橋短髮不堪把月明影瀟瀟窮

居遠城市殘生付漁樵翹首望八荒天宇高寥寥狂歌  
自成章聊以娛今宵

輓后齋詩

并序

悲歌之情慘於慟哭曩余聞吾后齋之訃也嘗為小  
詩以悼之歲月超忽三閱春秋矣迺茲九月之望夜  
宿草堂殘燈自明乃夢后齋抱一幼子偃臥于牀余  
往省之見其形容羸瘠淒然憐之撫之曰頃吾弟之  
疾也不謂其憊若是也答曰云云余又曰昨者有詩

來懷為吾弟誦之誦之則輓詞也更相勞苦戚如平生比覺四壁蟲聲寒月在戶感念誰昔不能為情追思舊作口占不可復識矣乃更綴數詩以紀余思以申幽明良友之義后齋吳翰茂獻之別號余表弟也天性孝友茂勲早世善事寡嫂撫諸姪女視財利甚薄樂善慷慨平生無怨惡於人其曠度達識余素愛慕之意其功名必將遠到孰謂其遽止於此也天可問乎哉無祿又不克年不以功名自見前古之人如

黃叔度李元賓輩烈烈至今者其名實固有所託也  
某鄙人言不足為軒輊立言君子將有以信后齋於  
千載之後者

君當遠別時驅車過我廬僕夫催載行而我還躊躇秋  
日風色寒送君臨路衢貧別無可贈慎保千金軀

忽得泥金報犁然喜可知別耗誰人將道遠或傳疑遊  
子竟不歸浮雲日南馳誰意曩日別遽作終天期

形聲日已遠魂魄入夢寐藜牀委羸肌拳足尚抱稚別

久喜見君傾倒平生意對君誦我詩覺來莫省記

晨起翻素帙索君寄我書時當初第日况兼抱瘵餘千  
里重相思誠情還寄余灑淚不能讀什襲當璠璣

愛材匪不長植志非不强鮮君心地好皎如秋月光秋  
月出重陰流輝天漢旁如何獨不見千載令人傷

為譚二府廼祖母節孝卷題

薦蘿依長松枯榮永相保結髮為夫婦契濶誓偕老燕  
爾未三春訣別何太早談笑入重泉一死復何道所念

乳下孤咿嘵守襁褓身疑衆楚咻家禍百憂擣置此欲  
安之雪泣向穹昊抱依親骨肉歸來奉蘋藻婉婉意不  
違姑嫜嚴自好老子復長孫宗祏凜再造離居六十霜  
脩眉攢不掃嚴風入深閨寒日白皜皜生平鐵石心至  
今祝鄰媼千載栢舟詩遺音尚可考

敘懷奉送黃君俊正郎謫戍惠州

黯黯陰不開濛濛雨初歇居人厭鬱蒸行子懷明發問  
子行何之謫戍向南越王事有程期山川望迢忽親交

頓乖張骨肉成契濶堂上太夫人顏髮白勝雪扶杖送  
出門回首腸百結生世逢休明登朝儼簪笏覆幬荷乾  
坤依乘近日月非無將順心恐或有遺闕臣命眇蚍蜉  
君恩浩溟渤惠州雖云遠風土非殊絕從軍雖云惡已  
得這鈇鉞高堂雖云暮為滂誠所悅况有膝下孫晨夕  
供甘滑行行重行行庶往無飢渴譬如選丁壯身隸長  
征卒畢命效驅馳為國樹勲伐嗟予尤慙愚猖狂速天  
罰死棄揣分宜蒙恩至今活犬馬戀蓋惟含情深刻骨



努力事耕耘窮年不暫出當子有遠行思子就一別執  
手臨路岐險夷期一節

蕭道長質夫見顧奉別一詩

葵藿傾太陽草莽共帝臣嗟予與夫子各為東西人拔  
茅事明主心跡兩相親我我冠危冠脩脩拖長紳糾彈  
司紀憲頂踵沐皇仁撫衷知感激就列敢逡巡入臺未  
十日君疏耿前陳旁觀咸縮頸梗議一時伸效顰絨短  
章排閤干紫宸狂謬自速辜赫勞帝怒嗔獄戶寒無春

陰陰晝旻旻揣分甘一死奚能植躬身君時事營球噉  
噉焦口唇罪重不可貴末減充編民失勢落九天歸耕  
瘴海濱結蓑學漁釣買斧事蒸薪昨宵夢京國輦路揚  
清塵君門邈九重徒然愁我神搏風殺羽翮欲進誠無  
因君今銜使命前茅光八閩前日寄書來此意良已勤  
遙遙雙旆旌早晚到城闌州民異禮數服野方山巾公  
門不可入此意將何申君復惠然來輿馬光四鄰平生  
重意氣別久意彌真經濟須賢達迂愚甘隱淪努力各

自愛致遠無緇磷

飲黃石友人黃正可晚青亭和師山題壁

戢影落名山歲月累云周如何咫尺地茲亭今始遊小  
草冒庭幽寒花明牆陬撼撼高樹聲蕭然似林丘西風  
天欲暮雨意鳴靈鳩主人有好懷開尊更獻酬相與各  
賦詩談笑銷百憂愛此同遊人俱維靜者流盍簪誠足  
樂萬事吾何求

默所詩

一動還一靜一語還一默語默動靜間誰能但墨墨動  
以靜為本語以默為常靜翕動乃闢默勝言彌章聖人  
欲無言德盛物自化賢人謹其言言垂千載下凡夫言  
孔多掀唇恣啁啾何能崇令德忤物生悔尤嗟哉此心  
微出入係敬肆須臾失所操潰濫何不至王子領庭訓  
默所以自箴非徒結其舌尚亦謹諸心集木如臨淵志  
大心轉小千言不為多一言未為少是謂靜之理常寓  
動之中嘉言會有聞千里欽英風下士情心學恒言雜

好醜氣剛劇欲吐有若銜余口當夫未悔時好狂復如  
癡俟夫既悔時奔驥將焉追常誦古人言語叱默固好  
愛助誠無由庶幾用自考

題九霄菊卷

海上白綸巾愛此黃花晚借問開茅堂屏列饒百本今  
年春夏交霖潦佳苗損鎔砑蒼石孤絲茸綠苑蹇涼颼  
驚節換獨酌情未遣偶此見華姿熠熠滿芳苑生態各  
低昂幽馨任舒卷暮對及宵缸晨窺廢朝飯忽若塵慮

遺頓覺道心遠桃李漫歲蕤摧落易朝菌荒徑拂松霜  
移根自持畚

禾稼在野人有更生之望喜而賦此

萬室如懸磬盼盼望早秋皇天亦悔禍雨勻風力柔虹  
霓不為殃嘉種滿南疇老農欣見之庶寬飢渴憂脫粟  
幸一飽甘脆吾何求

低田美禾稼高田饒黍菽豐歉昧前期苦樂易翻覆貧  
者嗟已流死者不可復何當忍須臾待此歲時熟

侯山別墅視獲贈樂渠黃公

薄田在何許蔚彼山之阿瘠土何磽确五侯空嵯峨盛  
夏霖潦集溪澗成江河圩岸善崩塌修築為力多力多  
不足惜歲晏其如何

良田畝十金坂田賤易得不慮井稅多功倍寡所獲早  
禾隨波濤晚禾苦螟螣瓶盎未可期十口聊塞責耕也  
餒在中先聖有遺則

高秋收穫時星言向田墅童稚俱在田牛羊牧煙渚四

顧但荒山澹泊寡儔侶悠悠空自知落落竟誰許不有  
黃石公誰可與共語

君既辭朝簪我亦謝城闕石田不可耕謀生何太拙  
上多白雲松間足明月豈可充朝饑聊以自娛悅遙遙  
千載心長沮與桀溺

壽闕

壺公西南來山水多奇變雲木相蔽虧樓臺遞隱見代  
更歲月深族聚子孫衍世業但詩書生涯足耕佃淳龐



古俗遺騰踏清時彥野性厭丘樊遐觀窺海甸得造幽  
人居遂與幽翁面聞名情已馳考德意彌戀行已惟存  
心居家恒積善溫溫崇謙冲抑抑恥矜羨撓甲數之周  
星躔光始遍精神臯鶴姿容采桃花片令子具宏材留  
都拜佳選天書美賢勞朝列華嚴弁浩蕩沐恩私光榮  
霑宅眷高堂壽域開南極老人見天桂黃飄筵江魚白  
入膳霞林發清輝石鏡光百鍊綵袖春風翻華觴佳客  
薦縉紳陳文詞親戚倍歡忭拂拭綠紋箋摩挲紫石硯

為君作長歌一續王喬傳

題張教授必學慈孝永思小卷

生別何草草死別何悠悠霜落荆門樹蕭然天地秋攜  
孥一萬里祿養為親謀茲事已不及鐘鼎將奚求婦姑  
平生歡瓶罍千載羞蓼莪我不忍讀灑淚滿山丘

題石渚逋仙隱几看梅卷

天地閉窮冬湖山三尺雪十日不開門寒花近可折挿  
置玉壺中壺永味增冽隱几已忘言對此自怡悅拈起

便成詩詩神轉清絕

題天階集疏卷為章三洲作

夫君東南英起際雲龍會中舍披日華西臺挺風檠埋  
輪欽古賢落筆帽時輩名動縉紳間影落江湖外九萬  
方迅征一息力愈倍向僕初登朝寡識言語諄鍛翮荷  
生全推心安可悔甘為草莽臣老死聖明代搔首望京  
華浩然成獨嘅

題章三洲易學紀成卷

天覆與地載大易行其中先天地而有後天地而終氣  
機自活潑理趣何冲融嘗聞古聖人爰有包羲氏洞徹  
陰陽闢妙寫鬼神秘迺始作八卦重為六十四畫成方  
有易易在未畫前一畫復一畫其勢皆自然先天雖無  
言默焉思已傳爾來幾千秋聖聖凡屢作先後互發明  
燦然在心目昭揚玄中玄所以覺後覺孔氏編三絕猶  
著為六經家傳而人誦萬古垂日星聖朝重置師教育  
充明庭吾莆富鴻儒正學紹鄒魯古老相沿襲近習迷

太古六經缺其一無乃太莽鹵夫子臺中彥謫官海上  
漬時哉深易道樂矣聞人文端然坐臯比開口吐所聞  
亶亶啟青衿無徒資誦讀剽竊口耳間祇用媒利祿善  
學顏子淵庶幾不遠復下士未聞道悔吝動相求既蹈  
浚恒凶或承覆餗羞洗心從君學庶用寡愆尤

遣吳氏女歸本宅

汝宗本華胄田園生理微頃遇歲年荒閭里共苦飢汝  
父抱汝來歲晏重相依汝時尚幼小出入須提撕朝嬉

同稚孫夕寢侍母慈所幸兒女仁羣儕安敢欺誰云非  
骨肉周視同女兒忽忽閱數年秀髮揚雙眉語言頗巧  
慧亦有佳容姿娟娟雲邊月濯濯花間枝憐汝漸長大  
白壁無磷緇嫁汝非所能留汝非所宜茲當仲春月歲  
豐物熙熙鳥雀育其雛啾啾鎮相隨人惟萬物靈能免  
顧爾私浣濯舊衣裳絨縷新履綦雖無環與珥粉黛令  
薄施遣爾歸而宗婉婉習女儀作配宜令門議婚當及  
茲再拜辭我去送汝門之畿東望五侯山路記初時來

叶人生父母心莫悲生別離六載今來歸喜極淚交垂  
祖母見汝來撫頂生歔歔叔孀見汝來感歎成嗟咨宗  
族妯娌間咸來視汝為人生無根蒂飄蕩長風吹向令  
落他門寧有生還期汝伯俟齋翁平生心相知歸時相  
問訊細話此中時

題張恥獨手卷

獨行不愧影獨寢不愧衾我誦古人言應知古人心古  
人幾千載其心垂至今伏地雷驚蟄聞天鶴在陰勿謂

獨不知儼若鬼神臨勿謂獨不彰殷若鐘聲音所以君  
子人幽獨在所欽夫君號恥獨茲意一何深逝將書戶  
牖庶用存規箴性情時靜觀義理日幽尋毋使爾茅滋  
望致蓁莽侵童冠相追隨讀書松桂林人事多乖違出  
入昂與參君遊碧海涯我老青雲岑秋山風日佳蓬萍  
偶盍簪撫卷索我詩引吭為君吟務學貴得朋獨知豈  
所任靜定恒自持狂馳誰共禁願言崇令德致重比南  
金



題網魚圖

十年結一網網魚東海邊  
孔疎魚不罾望洋思悠然  
小大用各適迴撓姑舍旃  
我有白玉鉤炯炯掛青天  
期將龍伯國一舉六鰲連

題龍

怪物生江濱時潛以養智  
頭角雖崢嶸獨力難自致  
春雷破頑陰風雨復時至  
變化升九衢焱燹著靈異  
噓氣生青雲沛澤猶未試  
萬物天地間闢然返生意

題虎

大物奮神威羣毛俱辟易  
藜藿遂生榮林巒增赫奕  
邇來雨露深荆榛自堆積  
妖狐時媚人鼯兔日交跡  
日暮天無雲啾啾恣啖咋  
安得矯矯姿耽視坐密席  
長嘯生清風凜凜鎮宗祏

題小景

江南多仙山歷歷挿晴昊  
歲晚無嚴霜山寒色更好  
綠厓見紅花涉逕得綠草  
高寺憶遠公玄談事幽討  
鳴鴉

飛青松曾見此樹老人  
生難百齡行樂苦不早  
委運任去留身閒以為寶

題兩山手卷

夙懷巖壑奇不受塵埃障  
悠悠草堂間岑崿俱相向  
壺公挺以青穀城麗而壯  
飛翠白雲隅開圖清漢上  
山氣日以積君心日以舒  
誰知蛟龍蟠嶄然頭角殊  
杏園春自好桂樹影扶疎  
無言自永日獨契包羲書

遣女

吾年四十餘生汝苦不早少小心甚憐晨夕寘懷抱有  
姊亦齊肩相將離襁褓傍母恣嬌癡綽約花枝好人生  
易乖張一別何草草娉婷隻影孤戚戚向兄嫂仰賴大  
母慈教育均覆幬一婢習所安內顧免煩惱今日當有  
行貧家事枯槁汝歸母不知拜泣傷我老里門東西居  
近別非遠道殷勤奉姑嫜黽勉羞蘋藻勗哉往汝家溫  
恭以為寶

題晚齋卷

高齋既瀟灑  
匡坐晚尤宜  
廣庭落疎陰  
仰見青冥枝  
聿當霜霰候  
蔚有春陽姿  
道心與之然  
把玩恒自怡  
少壯足努力  
老大徒委蛇  
百里半九十  
古老言吾規  
願君崇令德  
歲晏以為期

名園花贈筆峰

名園饒佳花  
紅紅兼白白  
同沐雨露濡  
嫣然各自得主  
人勤夢寐蒐羅  
殊未極千金  
購梅榴昇致  
百夫力凌躡  
畫堂深間  
簾雕闌側  
芳心猶未展  
錦袖時拂拭  
泉石開

風霜終日鳴拍拍憔悴顏不怡睚眦中叵測耳語細溫  
存陽春初不擇是種善性靈非直芙蓉色秋晴駢實繁  
日曬紫房圻滿眼粲珠璣磊磊子可摘充彼豆登羞慰  
此宗祊責平原賓滿堂能者為上客努力各勉旃先登  
勲可策

寄陳璞齋

不記君別時歲月良悠悠昔別髮盡白況復經數秋非  
無一紙書天長路阻脩時時向令子勤勤問安不昨云

有家訊字細如蠅頭起立索書觀想君眼力優書言客  
遊倦旦夕買歸舟又言綠水隩欲卜林塘幽沔池足菱  
芡刀田亦易求一心處兩端踳踳迷去留老去戀故山  
攜孥當遠遊數口隔異縣寧免羈旅愁山中破茆屋海  
田鹵不收頃屬飢饉後知識半已流生理已窮蹙圭撮  
不易謀故鄉雖云樂貧病增我憂舊遊多友生緩急或  
可投又聞閭里間還多好義儔男女就婚嫁親戚情綢  
繆澹蕩天地間何必念故丘秋葉鳴策策蟋蟀響不休

申旦不成寐思君見無由迢遞寄君詩庶無沈與浮

歲暮山中即事

愛此山中好迢遙山路斜梅樹我自種蕭條開數花好  
風遞微香初日影交加培根斲新出扶傾著橫叉撫視  
窮日夕曛黑未還家

種梅山逕邊下有牛羊道童豎恣攀翻糾纏易枯槁殷  
勤謝鄰翁愛此寒花好放牧須前山前山足豐草

此樹亦易種瘦地難為春鐵骨抱奇石隔歲翳荒榛



雀噪寒枝憔悴依霜筠栽培肆余力成陰屬他辰甘與  
木石居誰非草莽臣

明日是除日向此山中來百卉俱已腓寒花為我開冷  
淡聊自娛自非調羹才裴徊未忍去安知歲月催

七言古詩

壽百歲翁林公詩

海上神仙不可期河車金鼎誠支離乾坤大璞鑿已久  
人生滿百歲者誰黃石之陽林氏叟皓如松雪垂雙眉

行年一百不計閏三萬六千日又奇神強骨壯善食飲  
手足便利無傾敝旦出里門事拜謁禮數春容忘倦疲  
傳聞鄰境作春事排當古物驚羣兒頰肩駢足快一往  
道路見者咸歎嘻殷盤周鼎失顏色兌戈垂矢誰顧之  
平生胷腹極坦蕩語言易直無嶮崎里中子弟薰雅俗  
千載下見義皇時天壽平格自應爾令德壽豈將奚疑  
天下亂多治日少百年昇平古所稀安得生逢明盛世  
列聖繼作登豐熙有目不曾見甲冑有耳不曾聞鼓鼙

歲時閭里相歡洽姻族共保無參差聖明推恩遍庶老  
烏紗白髮光期願人生如此足可樂和氣之會誰能希  
長夏芳辰屬初度草堂旭日春遲遲雲仍滿目環膝下  
繽紛賀客陳文辭遠近來觀填巷陌氤氲瑞氣光門楣  
此翁精神真大耐將來歲月浩無涯天馬山人鎮無事  
年年來送壽翁詩

送丘元鎮元秀二生還武夷

昔年我過大安驛初聞生名未相識杖策迢迢千里來

弟兄兩映連城壁長兄才氣豪且雄一掃數篇纔一息  
季弟文思浩莫當拈題書楮盈數尺少年文彩蔚歲隄  
顧我摧頽真不及梗楠梧櫟稱美材狹邪平敘俟繩直  
顏顏師席聊復然摘發瑕疵痛裁抑等閒點化易為功  
一家言語成組織武夷山水多才賢前哲立言繼六籍  
本根深沃枝幹蕃滋溉栽培富學術吾徒正學宜勉旃  
文字區區固餘力

鉅齋楊老先生八十初度外孫張大章友人也持

此為壽某敬為題數句共致慶祝之意云

東風吹庭著花枝  
鈍齋先生初度時  
簾櫳光射日杲杲  
笙歌聲暖春遲遲  
人生富貴何須早  
歲晚蒼松看更好  
清階十轉帝恩深  
五馬歸榮身未老  
乾坤賦予何太偏  
栽培善慶理宜然  
甲子重番又廿載  
嗣來星紀無窮年  
齊眉內子鬢雙白  
扶藜相對如賓客  
諸兒鵠立內外孫  
莫是神仙真眷宅  
瞳清氣健好容顏  
留與後人作畫看  
共說香山諸老者  
如翁五福定應難

為雲莊王翁題壽軸

雲莊之山飽遊適早聞翁名未相識野人蹤跡無端倪  
煙水微茫易昏夕鹿門隱趣亦何深向平婚嫁會當畢  
弄丸靜學無極翁擊壤高歌太平日四序平分秋正中  
百齡十計數涉七蓬鬆霜雪未蒙顛拜舞兒孫還繞膝  
人生如此絕可憐豈必金多與高秩余方落魄忘賤貧  
家有嚴君偕七十天性真歡事偶同蒸民好德情何溢  
扣門陳子索新題拂素濡毫聊一述

寄竹坡施先生昆玉

尤川古邑佳山水雙峰巔岷水清泚地遠民風淑且閑  
漁釣還多隱君子薄遊已作廿年期只今魂夢長依依  
扁舟欲往關山阻一鴈不來音信稀極目溪雲擁溪樹  
君遊是我曾遊處漫題短句送君行直把愁心向君去  
地主竹坡好弟兄論交結識舊有情班荆坐愛蒼苔煖  
攜手時聞寒玉鳴一從放逐更多病寂寞郊扉掩芳徑  
摧落平生四海心真如縶驥氣空橫君到尤中見故人

為余傳語寄情親  
木蘭煙水壺公月  
短髮蓬鬆一角巾

送邵仲德

春風香吐長安陌  
君乘高黃我馬白  
得路俱承聖主恩  
彈冠共作金門客  
小臣感激期致身  
願為良臣為忠臣  
策名自慶逢明世  
曲學曾應笑古人  
迂濶肝腸傷瑣細  
夢寐晤言無次第  
死棄真甘鄙分宜  
生還仰荷皇威霽  
一墜九天失世榮  
菑畲自稱妻兒耕  
壯心已逐丹楓落  
白髮幾看青草生  
君今南去緣何罪  
萬里揮戈戍邊海



直隨萬壑赴東溟  
湯湯曾見滄波改  
日黑柴門未止關  
邂逅青山黃石間  
昔人漫道從軍樂  
客子休嗟行路難  
越溪閨嶠異關塞  
瘴嶺嵐煙須自愛  
更聞執手慷慨歌  
丈夫命存百無害

寄題景范亭

武昌之山落何處  
江海淼茫隔煙霧  
景范高亭倚大荒  
朝霏夕靄橫蒼蒼  
亭高思古向來久  
亭中主人應白首  
結交海內盡豪英  
慷慨何曾接杯酒  
石溪張子吾故人

昨來歸自楚江濱相逢抵掌為余說幾見茲亭風景絕  
席帽低臨山頂雲瑤觴追吸湖心月寒潭密竹晚氤氲  
紫荊花發生清芬俯瞰南窻望八極令人長憶范希文  
希文襟度何磊落高行濶步向寥廓朝營暮度求羸餘  
大笑世人空齷齪堯夫心事乃翁同東吳故舊漫相逢  
麥舟一擲歸徒步家庭唯諾何從容千載高風竟誰續  
近湖兄弟美如玉錦袍玉帶光熒熒紫誥金章照人目  
千鍾厚祿寧自腴傾圉倒廩俗人無丈夫意氣每如此

歲月從容古道徂浩浩長風吹漢水茲亭高詠滿人耳  
我欲從之路阻脩回復歸闌誰倚徙君往湖南訪舊遊  
滄波放棹洞庭秋楣間琬琰庶無恙從君一上岳陽樓

古松

誰將繭素剛一尺寫出寒松千丈直高枝多半入白雲  
眼前夭矯蒼虬立鱗甲振奮掌爪撐左擎右攫令人驚  
劃然霹靂欲飛去動地波濤風雨聲

與筆峰贈別

昨日迎君南山南今日送君北山北五日十日留使車  
千山萬山動行色二十我冠登漢朝三十金帶光橫腰  
四十煌煌將使節栢臺薇省揚清標只今年華未五十  
精神意氣誰能及揮鞭躍馬蒼梧來萬里咫尺風煙開  
黃金臺前拜天子傾倒盡交天下士文章器業時共珍  
大夫特達有如此我忝清朝法從臣摧頽鮒輟一窮鱗  
生還北闕誰將引老去他山空復春城市山林各所遇  
坎止流行無定據世途詰曲多波瀾丘壑寬閒足雲樹

新霽嵐光路不分  
欲別未別心氤氲  
執手何由表情素  
剖贈山中一片雲

與方山黃公

上有高天下有地  
前者古人後萬世  
遭逢幸值休明期  
公道正當天日際  
丈夫樹立自崢嶸  
妾婦媿媿真瑣細  
夫君廓落東南英  
剛方氣骨自天成  
食祿惟知天子法  
當官那顧俗人情  
俗情傾巧利鑽刺  
顛倒功罪移重輕  
君為朝廷惜名器  
名器豈是私家事  
杜絕請託謝諸公

檢閱簿書戢羣吏爵賞皆由主上恩遷敘何能勢力致  
通者未免謂之迂天下人心安可無庸人或又謂之怪  
累朝成法忍破壞天門翹首近咫尺祇畏官箴盡臣職  
自誓吾心有朴忠不愧鬼神惟正直當寧臨軒念遠民  
出參藩政撫全閩單車已歷風霜苦淑氣須回海嶽春  
溝壑平生心不改江湖戀國意彌勤披挹高風聽清響  
邂逅芬芳真可仰廿年蹤跡寄滄溟十口生涯在草莽  
懶將名刺謁君侯剩是漁樵鎮來往羨君忠信心不欺

重君意氣心相知淪落孤懷聊自壯甘棠春雨寄君詩  
藩伯方山黃老先生昔典武選操守剛方天下之人  
想望風采竟以此補外來撫閩藩黎民懷之某海濱  
耕農謬以疎直見許臨風遣此用寫高山景行之意  
云

題兩山手卷

壺公卓落三千丈穀城嵯峨屹相向山前滄海盡桑田  
一望平川豁如掌道人結屋兩山中日日還登兩山上

一莖蒼玉過眉長，小製山巾玄鶴氅。  
放歌倦憇古松陰，洗藥近聞百泉響。  
有時蘭水弄扁舟，落日孤蒲橫兩漿。  
人生淡蕩自可憐，富貴倘來安所強。  
世間衢路轉欹崎，物外乾坤自弘敞。  
昨來寄我新詩篇，句帶煙霞色蒼莽。  
我家近在兩山東，十畝瓜田接平壤。  
市塵迴隔不見人，乘興可來亦可往。  
百年誰是素心人，松葉柴門須一訪。

送江城尹黃時簡

憶昨與君聽鹿鳴，雙騎駿馬朝神京。  
少年快意輕世事，



謂言唾手成功名功名牢落如捕影蹤跡聚散同浮萍  
東書三上獲一第濫竽旅進充明庭瞽言謬發昏醉夢  
幸逢寬政逌天刑歸卧荒山饒歲月十又七番春草青  
嗟君蹉跎更晚遇四十釋褐尹江城清操所難君子守  
去思重見古人情掄才共儼登臺省列爵還應待俊英  
丈夫出身事明主拔擢任使生光榮夙夜靖共須黽勉  
冥頑慚愧負生成陰晴南國仲春後水陸中州萬里程  
送子長安何處是五雲宮闕日邊明

朋竹篇

黃君耿介孰與儔荒園高臥孤亭秋城市經年不到  
柴門淨掃無交遊平生肝膈向誰是獨與此君同意氣  
撫几時聞空外音樂飢自餐淡中味昔賢交誼稱雷陳  
君與此君意更真四十餘年舊知已久要未須讓古人  
長身玉立儼生客毅然不肯借辭色祇將正直結君歡  
還以清脩助君德道情澹泊兩相宜一日不見君不怡  
炎歊坐忘白日午雲霞共訂滄洲期可愛春陽桃共李

婉態柔香爛如綺榮華眩眼得幾時  
翻覆瞥人猶澈屣  
結交莫結桃李花世情輕薄令人嗟  
所貴於君善取友  
傾蓋相從到白首

題揚州卞鶚臯七十壽詩

蘅翁蘅翁好氣魄瑰奇磊落風雲客  
壺山蘭水不住身  
淮海維揚有舊宅揚州城市多故人  
就中誰與最相親  
傾圉倒廩重然諾鶚臯端合如翁人  
少壯交遊今白首  
江北江南前來久春風昨日寄緘書  
千里殷勤問安否

此翁年紀今幾何問道如翁還較多泛湖夜醉船頭酒  
舞影時翻月下蓑蘼翁强健天所假出處安危繫天下  
東山非久臥安石洛下行當起司馬中流擊楫大江深  
官堤楊柳增繁陰故人出逐郵亭外盡說相思一片心

題彭典史竹坡手卷

竹坡主人何昂藏丰標白晢髮毛蒼金閨通籍齒方壯  
天路聯鑣志正揚萬里獨過梨嶺道一官恰對壺山陽  
俸錢微薄能幾許世故艱難已備嘗政有催科憐我拙

民多凋瘵令人傷毀譽榮辱無端緒期會簿書有故常  
求牧正塵憂國意烹鮮自試活人方海田歲熟農家樂  
公館春深化日長可是宦情宜土俗何曾雲物闕江鄉  
望中魏闕青絲騎夢裏高坡綠玉牀文字平生敦宿好  
薦紳投贈富新章無求偏覺人情好寫意成詩滋味長  
乘興揮毫聊一掃老懷醉墨笑琳琅

雨竹

有石有石生岷竒有竹離立靜相依枝垂葉重翠欲滴

雪霽滿園春雨時道情愛此挺寒玉盡日披圖看不足  
屬饜人間桃李花能紅能白總塵俗

老梅

朔風稜稜寒蝕鐵梅花一枝白勝雪東皇仗爾報先春  
未許狂風便吹折平湖杳靄澹生煙遙海蒼茫欲上月  
此時此景難為言詩思撩人清可掇

和江少峰二府壺山詩

海上嶙峋百二峰紫氣青靄遙相通中有貝闕藥珠宮

高標萬古稱壺公，開初原因造化功。  
巍然特秀寰區中，喬嶽名山罕與同。  
青天濶幅無畫工，撐拄日月自西東。  
範圍野馬行平空，層巒疊岫各龍從。  
龍拏虎攫爭豪雄，此公卓立勢自崇。  
邃谷沕穆多淳風，混沌未鑿猶顛蒙。  
神光煜煜照祝融，古木鬱鬱蟠蒼穹。  
野人開戶對龍蔥，朝挹爽氣煩襟沖。  
援筆欲賦慙未工，逝往山中攀桂叢。  
罷官已買青雲驄，禁垣詞客譽望隆。  
詩成寄我農家翁，江湖廊廟意無窮。  
山風水月興彌充，已幸寬政蘇疲癯。

手斡元氣成歲豐擺脫塵鞅披心胸黃堂吏散坐高春  
此山相見明雙瞳作詩琅琅寫真衷有時不見情忡忡  
輕煙積翠相溟濛石淙疾走白玉虹仙翁放出霽雲籠  
天地一氣但沖融

有題

壺山南來蘭水東水杉河柳相龍蔥中間兩族分周姓  
山川結秀生諸公東族夔夔翠渠叟清德斯世參天功  
西族巍巍雙竹翁鴻名刻鼎垂無窮繽紛臺省難指屈



錦衣象簡青雲驄瑤環瑜珥皆萬鎰治之不敢求良工  
珠湖吳子真國手禮羅非我求童蒙已見三冬立尺雪  
霄霄次第薰春風彬彬文字成杼軸撫謙抑損各相崇  
我忝西周傍倚玉早與吾友同磨攻義方師道兩堪賦  
綿才慙愧筆如虹

題寒泉手卷

巧匠竅堅垤得泉清且冽清如薄暮不雲之青天冽比  
陰山未春之白雪酈元水經不罣名仙源詎敢廁凡列

井德雖不移滋滋來不絕  
翬翬薦樽罍朱明失歆熱  
文園病渴臥空山長日惜  
惜心不悅欲尋藥草古方  
無期向源頭澡澄澈

題雙壽手卷

城東兩株樹亭亭恰相向  
枝葉覆闔都半落青雲上  
故老傳來七十秋清風琴  
瑟鳴相酬有時青天吐明  
月珊瑚拂鏡當空流只今  
顏色無衰改傲雪凌霜鎮  
長在坐令邑里生輝光那  
羨蟠桃隔滄海

題全懿堂古詩一首


全懿高堂渺何許重湖濛濛隔煙渚  
閩山回首白雲垂落日淒涼愴誰語  
堂中太母年少時一念孝誠衆推與  
雖雖鳴鴈新相和蕩蕩長天失其侶  
阿翁年大阿姑死隻影娉婷兒方乳  
衆口喧啾太聒人細情姑息偏憐汝  
兩髦一醺真不移萬夫獨勇誰能禦  
忍為弱草負乾坤誓作真松挺寒暑  
髮焦塵鏡掩鉛華手裂殘燈事機杼  
年年草屋閩青陽夜夜繁霜入白芋  
愛兒早不廢詩書

惜兒苦不欠筆楚燃薪照夜眇眼眶移几就暄遍亭宇  
柳家辛苦資熊九陶母殷勤事雞黍心堅分作未亡身  
眼見兒成進士舉直將持此報夫君笑入黃泉真死所  
孤兒追慕無休期冰蘖官箴佩遺矩朝出倚門暮倚閭  
九原路杳空延佇君不見千載蓼莪詩令人一讀淚如  
雨

楊震辭金小軸

我愛關西楊伯起唾視黃金如敝屣冥冥之中能不欺

千載真心照寒水薦剡名流定出羣懷金莫夜通殷勤  
莫道故人知己少故人應亦未知君



天馬山房遺稿卷七

欽定四庫全書

集部

天馬山房遺稿卷八

詳校官給事中臣王鍾健

中書<sub>臣</sub>劉源溥覆勘

總校官庶吉士臣朱 鈐

校對官中書<sub>臣</sub>張曾效

謄錄監生<sub>臣</sub>趙廷璋

欽定四庫全書

天馬山房遺稿卷八

明 朱漸 撰

五言律詩

寄吳一嵩別駕

一別都門道生涯各轉蓬相逢重把臂多病已成翁附  
驥思前日冥鴻想下風看山朝撫几拄頰五侯東

朝市多榮辱山林無是非莫將軒冕貴博得蒿蘿衣撫



事才偏短為農願不違歸來陶靖節歲晚幸相依  
疏傳風流逮于今有耿光壯能行所學老不去其鄉袍  
笏抽身早田園引興長瘦筇雙短屐漫步晚山蒼  
萬事浮雲外蕭然一故吾菜蕪傷道路歲月感頭顱野  
性無羈管滄江足釣徒朝來公事併搔首辦詩逋

題劉慎齋墨蘭

衆莽共披紛茲蘭迥出羣孤根依靜石久伴結芳蓀空  
谷無人到清風獨自聞擷枝無可贈惆悵憶夫君

吳明通別駕臨老得子有詩見貽作此答之

投笏歸來早林園興若何餘金逢寇盡短髮入秋皤別  
駕親鄰並清詩細琢磨弄璋新有作寄我費吟哦

同馬師山訪山齋先生于蒲坂別墅晚遊戴家水

亭師山有作索和漫成一首

野性無羈管同人作漫遊曲橋流水細古木小亭幽禿  
筆憑誰借清詩索我酬扁舟閒倚岸鎮日此淹留

贈孫芝溪孫君廷載家世縉紳遊意岐黃之術別

號芝溪侍宦來莆小詩奉贈兼呈尊翁先生以  
為何如

公子有奇好芝溪靜卜居還從塵外境細讀枕中書短  
展春山裏長饒秋雨餘欲從問真訣何以愈迂疎

丁亥六月七日夜書寄道通弟

南浦王孫草歸來定幾時篝燈當此夕千里重相思志  
士懷偏壯孤臣鬢已絲山中誰晤語鎮與白雲期

慶朱若思先生六十作

塔麓凝靈秀翁家即壽鄉  
厯頭新甲子鐵面舊風霜  
綵服春初入雲林樂未央  
百年當此日幾度薦華觴  
蓬萊不可見仙子亦應閒  
紫陌紅塵外蒼松白石間  
蕭然忘歲月可以駐容顏  
自是長生訣何須問大還

題姚同年在明虛谷別號卷

塵紛不可到白日悄沈沈  
自爾發靈籟何曾聞足音  
靜探無極蘊妙契聖人心  
欲問潛虛子雲關一許尋

扁舟汴水蘭宿西冲僧舍  
同馬師山和顧頤齋韻

古寺倚巖阿春風款碧蘿烟霞宜野客猿鶴訝初過已  
覺諸天近還期明月多老僧緣不薄投榻意如何  
坐愛山中靜庭柯永日移婆婆遊客影消息野雲知釋  
子何年往溪光入畫竒題詩饒絕壁應作後遊期

題此峰詩卷

我愛烏山下悠然一草堂此峰高不極開戶正相當玉  
柱撐元化濛雲雨八荒道情將野意相對入冥茫

西方成蹟為王通府題

宇宙皆吾分物情便苟安丈夫當許國王事敢辭艱鑿  
地開新險成堤障倒瀾惟應西郡乘千載不能刪

山中雜咏

冬杪暖於春晴初絕點塵看山因到寺落日不逢人石  
陟憐苔澁天多覺樹貧鄰僧收敗葉來淪茗花新  
風定木初落松寒鶴不來衡茆還我獨草逕為君開宇  
宙無窮事煙霞百尺臺憑高舒一嘯能賦豈吾才

贈別黃方山

金史卷之三  
廉靡嗟流俗剛方慕古人朝廷三尺法男子百年身道  
已齊榮辱時哉任詘信蒼生須料理行路展經綸  
高賢自城闕下士祇山林未必平生舊相期一片心風  
雲人事改天地主恩深白日關山道歸囊有素琴

贈南洲

南洲棲隱處東近五侯山心跡浮名外行藏晏坐間新  
詩頻入刻逸興許誰扳永日衡門下何人數往還

龍泉王公尹莆有惠政焉洽於吾民茲當考績小

詩奉贈以致惜別之情

海縣青郊外歸來借一廛自憐身計拙喜得使君賢井  
食惟輸稅丁差不費錢可能忘帝力耕鑿自年年

一麾江海上三載屈英豪秩滿宜登最民懷有大勞青  
山遮去轍白日照征袍遠業深相勗臨岐贈寶刀

遊山

開年初二日亭午不雲時拉伴無前約探春恐後期松  
寒聞子落野迴見人稀風物供登眺莫嫌歸去遲



題宋友泉楊休錄

從政何曾易居鄉更自難大都交際處總在是非間去  
日留遺愛逢人不愧顏鄉評與士論千載不能刊

題黃南金先生迺翁翠筠輓卷

翠筠不可作空慕翠筠名緬想林泉趣都忘世俗情晴  
曦疑雨色靜夜起天聲回首閩雲結偏將老子誠

小池

籬落能多地居然鑿小池白蓮還自種幽興有誰知清

曉露華集空天月色宜江湖萬里思把翫獨移時

題節婦手卷

別去何太速百年未有涯殘生惟一死萬事只孤兒白  
髮丹心苦青天明月知哺烏情不展灑淚蓼莪詩

題陳居素手卷

榮華不可慕素履重偏長別業居幽處名山對草堂招  
尋無俗侶供具祇家常時挹南華老靜談秋水章

壽

關

生榮誰不羨具慶世應稀嚮用康寧福相將老大時教  
忠餘古意許國是男兒遙致南山祝長賡天保詩

題山房

北極煙霞迴西軒水石寒何年歸栗里前夢說邯鄲涉  
世情偏懶讀書興未闌尚懷明主戀炯炯寸心丹

和南安嚴年兄

共向山中宿夜來山雨鳴不知身世在獨覺夢魂清鐘  
鼎何年事刀圭幾日成從君托幽契端坐話無生

送陳把總升都閫

南日關天險安危仗虎臣  
掃清輸壯畧控帶及全閩  
專閫分符重三軍別意親  
先聲應破膽談笑靜風塵

在張此山讌席口占

積雨初晴夜東風送暖時  
高燈明綺席雅曲荐金卮  
爛醉生涯在留歡別去遲  
百年良會幾呼筆一題詩

七言律詩

和吳文宗南洲別墅落成之作

重訪南洲路轉迷閒居底用定幽溪晚田石溜穿渠水  
老木煙村入望低已分迂踈供白眼不嫌粗糲有黃齏  
洲前風物無羈管一一還君自品題

乾坤賸得此身閒水石蕭然屋數間小結亭臺無俗物  
便於人境隔塵寰半生舊事渾如夢終古青山不改顏  
雨笠煙蓑了春務幽篁盡日掩重關

輓彭甫僉憲先生

襟抱冰壺徹底清門牆曾一拜先生十年夢寐空萍梗

萬里歸來失典刑出處高風闕世教乾坤公是有鄉評  
平生述作羞諛墓獨愛斯言不媿情

寄張行之水部時在蕪湖司課

春日西臺共賦詩只今已隔兩年期升沉爾爾何須問  
消息茫茫總不知落日重湖牽夢杳南天寒鴈送書遲  
鼎彘竹帛真君事我向滄浪買釣磯

和方可吾天壺洞話春詩韻

壺亭佳處作春遊春萃壺光越分幽竹下踏歌同岸幘

花前呼酒錯觥籌雲開晚照初移席天落平波好放舟  
却喜閒身渾健在敲扉還許數相求

和馮檢齋方伯賜詩

瀾水壺山已隔生何期使節重行行直從當宁分憂顧  
終與斯民致太平茅屋惠來今雨候德儀端拜古風清  
明公事業須鐘鼎沮溺都忘世上情

前驅簇仗度江亭萬頃雲濤洗眼醒直盡提封供指顧  
何須入界按圖經六年海國情無限一樹棠梨影滿庭

追省舊遊渾不寐行吟幽思入玄冥

翁五松朝均廬墓資山乘暇一訪偶成

古寺平蕪一鶴林月明華表斷遺音驚風撼撼鳴黃葉  
疎雨曉曉咽墓禽宿莽已封三尺土蓼莪長抱百年心  
瘦筇踏遍蒼山路來歎柴扉話綠陰

和鄭山齋梅隴信宿叙懷二首

振衣直向八壺顛倦借梅花一榻眠閒愛白雲依靜渚  
清於獨鶴唳瓊田百年勲業溪山是千古文章日月懸



喜老可能無述作新編騷雅又玄玄

御前新乞得歸休雲水真鄰結小丘世事那堪供一笑  
人生至此更何憂偏憐梅隴宜明月浩有詩懷敵素秋  
回首古來多宦達功成誰向赤松遊

送亦亭方世講上舍謁選和韻

春日春風兩袂輕亦亭亭外即春明觀光此日應新寵  
循吏君家有舊聲離別休為兒女態祝規須盡友生情  
孤臣江海還多病望斷鄉雲憶帝庭

題漳浦南園手卷詹惠御史之弟

南園南望隔千里今日從君話勝遊  
筆格棋枰消歲月池臺花草領春秋  
前身莫是陶居士行樂真同馬少游  
回首邯鄲成一夢釣磯我已落滄洲

丙申歲臘訪甥楊繼宗子熙春讀書山中宿留賦  
此

不到東山應幾時森森松桂鬱深枝  
藤蘿剝落龍蛇骨莓蘚爛斑虎豹皮  
竹几安排深打坐雨牆摸索舊題詩

山中真侶分攜盡，忽憶商山採紫芝。

瘦筇扶我上孱顏，暝色雲蘿亦可攀。  
坐久亭臯聞木落，夜深霜露覺衣單。  
行衝野蔓披襟袖，歸種青松出屋山。  
丘壑風流輸略京華前夢說邯鄲。

遊山

東風應律景初溫，暗送微青入曉痕。  
落日天邊明積水，炊煙山下起孤村。  
蒼厓還我曾遊處，古寺無僧獨閉門。  
石磴不堪韉底滑，噤寒赤脚踏層雲。

鄉先正友泉宋公生平樹立不愧高第某以謏劣  
邈在下風永懷若人實深慨歎用述短章以致

景行之意云爾

一官輒軻餘霜鬢直道平生志不違富貴自來還自去  
乾坤公是與公非蒼雲古木新丘隴白石清泉舊釣磯  
欲擬大招追楚些臨風悵望重依依

一山鄒使君山中見懷和答

野泉歷絡路縈迴松葉柴門午未開清景偏於塵世隔

金定四庫全書  
卷八  
何人肯到白雲來  
逃虛久矣成真懶  
臥病居然阻此杯  
幽意道人須領略  
暮林啼鳥莫相催

深入名山且未迴  
百年難是好懷開  
雨餘松色纔生暝  
海上月明還復來  
錦字留題青玉案  
仙人招飲紫霞杯  
林泉入手休輕擲  
容易流光白髮催

碧塘存稿題辭

有引

窶夫薄田遠在五侯山  
曲時時往來其間而涵江黃  
君靜卿山莊適在翠微深處  
雞犬相聞而桑麻之影

交接也辱不予鄙輟耕有作亟以示予予亦得以所  
業就正蓋十年于茲矣近復得其碧塘存稿彙括平  
生所作蓋定本也聯日讀之愛其詞致閒適有古隱  
士之風為作七言近體一章以答來貺兼為請益之  
資焉爾

隱君結屋秋山下而我幸為鄰舍翁放犢每從清曉出  
分泉還許此溪通一簞粗糲豐年樂遺俗淳龐太古風  
珍重南金投贈意春餘定費幾郵筒

登梅峰制幹李公新祠

莆陽一水分南北童稚能知制幹名好義時從遺老說  
臨危深見古人情蒼山英爽宜尸祝白日冠裳有典刑  
松葉祠門伸一拜長風颯颯起天聲

和韻奉招方巖兼呈馬師山

移了新亭結了橋閒中日月此中消天晴海畔峰巒出  
雨足牆陰薜荔驕石掌橫撐當酒案松枝低亞任詩瓢  
方巖野客能相訪預報山靈折簡招

板坡翁獄中寄子由二韻

澹煙芳草共萋萋  
繚繞長堤極目低  
素食已應慚仗馬  
生還那敢望金雞  
一犁獨把無遺業  
萬里攜孥任老妻  
日暮愁心何處是  
八壺東畔五侯西

落魄長安不見春  
百年榮辱夢中身  
堂堂歲月雙蓬鬢  
碌碌乾坤一旅人  
海內交親閒屈指  
天涯回首正傷神  
和風阻水渾無賴  
南望湖邊又問津

無題



道情偏稱此官閒  
朝市勞勞百不干  
祇有清忠酬聖世  
更無撓節愧西山  
十年光景詩多少  
萬里江湖意未闌  
琴劍無多歸便得  
鄉心先過蓼花灘

寄題景范亭

瑞靄霏微半不分  
遙從江樹望江門  
橘中遺老今無恙  
竈下桐聲舊有聞  
葵藿丹心瞻日近  
庭闈風色及春溫  
自憐憔悴逋臣影  
釋褐曾霑雨露恩

二府少峰江先生同令弟章山哭其季方文厓上

舍得詩二首示及索和賦此

遠道音塵定是非西原空切春令悲浮生鼎鼎只如此  
合眼時時還見之青草池塘幽夢斷紫荊風雨暮陰移  
人情一別消魂後容易繁霜入鬢絲

野日悽悽翳病眸西風烈烈罕時休飛騰且被才名誤  
廓落俄驚歲月遒雲樹空遮千里道古今不盡夕陽愁  
殘燈孤館初聞雁正自傷魂況值秋

落花

花開長自掩柴扉聞道春歸却未歸出洞暗隨流水遠  
乘風高逐曉雲飛餘香正喜臨書幌秀色還堪著綵衣  
病起逢春拋藥裹摩娑瘦骨近應肥

倦倚危闌日未斜碧雲芳草遍天涯泥融海燕營香壘  
花暖崖蜂鬧晚衙撫景有時成獨笑留春無計轉須嗟  
何當一摘蟠桃實共結幽期九萬賒

一拂瑤琴一再彈春明那負酒杯寬紅英樹尾香猶戀  
綠玉庭心影正團清景可孤天上月流光堪老鏡中鸞

槁桐不盡相思調忍探當年白玉環

白石苔生紫錦鱗繁英碎點繡文茵攀翻曾被君王寵  
摧落均霑天地仁明月關河千里共春山風雨一番新  
長安陌上花如綺多少人間得意人

覓菊

有引

嘉靖二十年辛丑十月之望諸弟輩相呼看菊黃石  
歸來嘖嘖稱歎老子於此興復不淺也口綴數詩為  
求佳品植之因念昔陶靖節年未四十賦歸去來辭

當時三徑就荒松菊猶存某罷官適當其歲在萬星  
紀今年五十有六矣迺植佳花以償夙好為計不亦  
晚乎約每歲開時定作數詩以紀歲月較將來所作  
尚幾何也

羣李風流共一家相攜黃石看黃花主人好事那相厭  
得意不知時自誇秋水菱荷先隕落春陽桃李漫紛華  
十弓借與階前地為覓蒼金寸許芽

白髮黃花意自違野情秋色澹相宜懶從碧草荒三逕

獨對西風酌一卮真景聞人爭說賞心嗟我負襟期  
明年此際花時候拄杖敲門定是誰

高下還須費剪裁曉晴籬落錦屏開奇香迴與他年別  
仙品新從何處來生意天然難罨畫化工原自厚栽培  
陶公匪愛杯中綠直愛秋光泛酒杯

荷花博士古來有菊圃主人今是君雅操靜從霜後見  
幽香偏愛月中聞自憐浮世知音少誰把瑤華結贈殷  
萬頃秋光無盡藏滿籬不惜許平分

金  
與馬子師山夜酌月巖樓聯句奉相教和亦見野

人近況也

斜月高樓話二更

巖損

遲回往事寸心驚  
明河半落星辰

迴

山師

遠吹微聞蟀蟋鳴  
萬事只贏絲兩鬢

巖損

百年已許

醉深觥青山草屋誰頻訪

山師

共是逃虛不受名

巖損

城山雲接塔山雲

巖損

雲外相逢每是君  
堯舜巢由吾道

爾

山師

江湖廊廟古時分  
山深丹樹傷秋早

巖損

歲晚黃花

結贈殷愛汝風流能謝朓

山師

高樓幽思入清芬

巖損

蹤跡平生也自同

損巖

十年萬里一飛蓬  
逡巡不改芹暄

意

師山

丘壑寧忘怙冒功  
獨鶴孤雲更野性

損巖

藥囊書卷

却深恫忽驚鴻鴈清宵度

師山

猶憶燕山紫霧中

損巖

### 天馬山莊紀興奉懷馬君

歲月焉知漢與秦  
桃花開遍武陵春  
仙源莫只在平地  
聖世還須有逸民  
莽莽丘園三畝宅  
悠悠雲水百年身  
疎狂我已無心久  
荷蕢從來是異人

坐愛山中白日長  
毀譽不到水雲鄉  
苔封石磴芒鞋滑



花撲甕瓶村酒香老去一丘聊自足古來萬事定何常  
自憐坐久青山客十有九番春草芳

送李司訓遷官永福

秋深行色淡相關一片翔雲況可攀鼎呂已增吾道重  
巖廊曾得此身閒清真迥出風塵外吏隱更存水石間  
十載莆陽無長物逢人惟說八壺山

晚步山園口占紀興

小小山園寄翠微近連山市入煙霏蓬蒿未許荒三迳

花竹從教碧四圍  
細築雲根通野溜  
靜憑松葉啓柴扉  
吾衰脚倚青藜健  
日上時來月上歸

別彭丹洲

箕裘文綵動鄉關  
騰踏風雲興未闌  
赤縣名聲連白下  
丹洲鼓角接烏蠻  
濯纓正愛江湖濶  
走馬何妨道路難  
試向高峯一回首  
海天盡處是壺山

野夫

野夫多年不照鏡  
衰容偶自臨清池  
本來面目不可識

低首笑問公為誰崢嶸歲月今餘幾塌颯風煙乃爾為  
我笑亦笑竟無語竹枝搖曳光參差

遊壺公梁溪

縹渺仙源何處尋緣崖綠樹俯秋陰屏開綵翠疑新障  
玉散琤琮逸好音天意特遺賢者樂壺公真識野人心  
風流未數蘭亭事一笑從容豁胃襟

寄田拒山憲副

使君一疏歸來早家住萬山深復深解組已無當世念

讀書真見古人心白雲時下溪頭釣丹壑還從雪後臨  
我亦乾坤狂措大索居何處覓知音

千里迢迢訪敝廬分攜已是十年餘空山老去長相憶  
前月人來不得書川上風光原自好林間心思近何如  
江梅未得春消息贈汝雲安雙鯉魚

寄尤溪劉環經歷

把袂他年君別我題詩今日我思君只應共照三秋月  
何處相逢一片雲世事都成蕉鹿夢野情已入海鷗羣

舊遊回首人千里翠壁丹楓夕靄曛

和璞齋題岐南書舍

小齋空坐思悠哉心遠乾坤景自開憂國幾餘華髮在  
逢人先覓菊花栽宦囊兩世惟書卷塵事無端付酒杯  
避俗底須方外去杖藜隨處破蒼苔

賀方兩峯得孫

南望壺公不咫尺崢嶸天地兩峯尊喬松待得三千歲  
老鶴添生第二孫杳靄澄塘開霽色氤氲滄海浴朝暉

阿翁樂意知多少賀客時稱綠玉樽

與聞起弟

作意歸來莫著疑故園松菊自依依此心漫道無通塞  
萬物從來有是非岐路經多諳世故人情閱盡見天機  
耕原姻婭過逢地休向樽前賦式微

送筆峰王使君之官

一臥蒼山幾送君路岐南北任紛紛英雄名姓須青史  
薄劣行藏只白雲別意故應難入畫老人更自惜離羣

山中漫倚陽關調緩步微吟到夕曛

回師山馬君入城夜歸紀興

初寒不寒氣尚暄欲雨不雨天茫然城市經秋試一到  
野田把手行相牽向來許國幸無死老去為農逢有年  
暝色歸輿山路杳候門松火竹籬邊

愧山醉簡一山有作倚韻奉和

積雨初收翠滿山丹梯石磴共躋攀雲邊野色千村迴  
天上松聲五月寒坐愛巖扉當絕勝行憑風力上孱顏

虛無未覺蓬萊遠只隔煙波百尺間

山中贈別田拒山憲副

玉樹清芬不可扳遠書幽夢幾間闌須知天上歸田樂  
早信人間行路難千里不辭重命駕一燈相對共開顏  
青楓白露今搖落惟有松枝待歲寒

露洗青天百尺臺山靈預報使君來入門怪我頭顱變  
見面令人心眼開草徑誰當知仲蔚鶩湖正自想東萊  
海天佳處行須遍且盡明年二月回



未雨欲行雨且休客邊琴劍滯深秋重逢契濶何年是  
再展從容半日留童仆追隨成白首鼎鼎勲業付滄洲  
曉晴風掃攢峰出碧海青天快壯遊

昨日未晴今日晴東暝曙色漸開明潮回海岸蒼苔滑  
路沒溪橋秋水平人在他鄉為逆旅天教今雨試交情  
三山驛外秋風裏白苧衝寒雨弟兄

壽守素一首

有引

守素張翁是日華誕堅不受賀無以為情家有兩枚

酸柑積久收縮極小而色淡黃與消梨無辨名以交  
梨云是仙物侑以七言律詩一首持獻壽筵盛以朱  
漆盒裹以紅紙過於珍閼其家受之相聚而觀不識  
其為何物也駭嘆珍奇剖而舐之閨堂大笑騰沸歡  
聲守素啞然曰是損翁戲我也嘲我儒酸太甚耳雖  
然此菓惟酸之故可以久藏固所以壽我也翼日相  
見握手大笑老人相從林下戲不為虐亦自有醞藉  
風味故書其槩令子孫藏之為兩家異日故事

仙菓新從天上來，不知名甚轉堪猜。  
琪花自結千年實，閬苑還應幾處栽。  
異品莫須同火棗，奇香正可薦瓊杯。  
野人珍重春相贈，料取高堂笑口開。

此舅氏為先君壽也。先君長舅氏一歲每逢初度，互相歡娛，日月幾何，今俱不可復作矣。嗚呼！追惟菽水風木之恨，彌深瞻望渭陽，宅相之占，奚補用。跋數語聊紀寸心。甥張秉鐸志。

送王在曾春試

天上迢迢白玉京，少峰兼侍筆峰行。  
長江五月南風迅，大野三更北斗平。  
曉日擔頭明劍氣，蟄龍動處殷春聲。

青雲賢達無書久莫漫逢人說姓名

送鄭于藩春試

浩然一笑辭知己萬里青天更北行避暑起先紅日出  
問程望入綵雲橫騰凌海岱孤懷壯盥濯江河雙眼明  
此去功名須入手施為莫遣負平生

贈豐山陳子于庭

我愛豐山無俗韻時時來往小齋中野情自比天隨子  
詩句多師陸放翁環堵蕭然無一物才名早已動諸公

長吟盡日不知厭興入冥冥海上峰

代八峰壽田拒山

壯志何人便賦歸高堂深戀老萊衣百年光景春方半  
萬里無雲月正輝壽域圖開青嶂遠仙厨饌送紫芝肥  
華觴細度瑤池曲行樂從今願不違

扁舟同師山拜山翁于蒲坂別墅蒙賜詩步韻奉  
答

壺公山高蘭水深先生挑竹慣登臨東風蘋藻千年祀

落日江湖萬里心  
窄徑亭臺春寂寂  
聯村桑柘晝陰陰  
拏舟自笑孤狂子  
得侍儀刑伴朗吟

平臯斷岸蔚深深  
鶴渚山翁釣石臨  
憂國空餘雙鬢雪  
為漁已了百年心  
漫從雲水尋芳躅  
坐愛松篁落翠陰  
乘興重來應不遠  
扣絃還許續高吟

登壺山宿靈雲僧舍紀懷

似與名山有宿緣  
行行誤入八壺天  
老僧結屋層霄上  
稚子開門落照邊  
野桂香幽風細細  
庭蕉影靜月涓涓

金定四子全集  
卷八  
空堂聽罷無生話為借南窓一榻眠

翠壁藤蘿鑲石門此中又是一乾坤扶筇俯拾天邊月  
舉手閒招海上雲小院松寒僧自老野田稻晚鹿成羣  
仙源此去爭多少碧水桃花更有村

桃花洞裏靈雲寺信脚來遊宿願酬松下樓臺當落日  
山中風物正宜秋天低坐覺星河墜氣爽應知沆瀣收  
一鳥忽鳴孤嶂曉蕭然木榻夢魂幽

不是身閒事漫遊追隨朋益學藏脩避人更自嫌山淺

過景還須鎮日留  
薄宦升沈聊爾爾  
他年勲業笑悠悠  
松杉清影山窓月  
靜裏工夫得自由

題劉憲副翠竹山房手卷

世人見竹不解愛  
自是參差得意時  
地近尖星誰是宅  
溪環碧玉此君宜  
乾坤獨稟清虛操  
霜霰羣芳剝落時  
遙指闕山何處是  
臨風灑翰寄新詩

雲壑瀟瀟竹萬竿  
書來日日報平安  
天聲自發高難和  
雨色還疑秀可餐  
科斗汗青餘琬琰  
鳳皇秋實厭琅玕



卷八  
鄉關迢遞江湖遠百遠溪堂夢裏看

初度奉寄梁大參

有引

瀾石梁年兄生同年月鄙夫偶先三日壽辰奉寄兼  
述此懷

蓬弧此日君初度蒲柳之姿期偶同天地百年都是客  
江湖多病早成翁相思千里共明月極目停雲邈下風  
珍重歲時眠食好鼎鉉正爾待名公

五十七年六尺身攝提星紀又初辰摧頽那復風雲氣

落魄終甘草莽臣滿座壺觴諸客醉北堂菜綵一番春  
老懷自笑疎狂甚顛倒尊前白髮新

桂巖篇

滿目風煙悲世路幾人清境出塵氛小山叢桂原無主  
萬頃秋光總屬君秀色直從天外盡清芬偏好月中聞  
一筇欲訪幽棲處野水微茫隔暮雲

奉寄汀州太守

夫君近作長門守千里相思有素書揮灑正當公事暇

緘題兼惠俸金餘自憐失路偏多感深愧故人不作疎  
歲晚荒山何所有聊憑回使致雙魚

寄尤溪劉子潔

不見平生劉子潔秋風迢遞寄書來交遊寥落幾人在  
展讀摩挲雙眼開碧樹羈棲深水陸紫雲夢想舊樓臺  
夕陽西眺雙峰遠別意臨高未易裁

拈君玄玉磨清水坐向松風寫我詩世路多岐成久別  
故人千里費相思移家別縣生涯薄去國孤臣死分宜

萍梗重逢何處是臨風灑翰一凄其

五言絕句

贈大田縣范玉溪

一琴三尺劒  
艤棹北溪濱  
莫是玉溪子  
迢迢訪故人  
我愛玉溪子  
放舟玉溪上  
蕭蕭蘆荻秋  
明月恰相向

題扇面

濯足詠滄浪  
江皋一草堂  
秋清目力遠  
天際客揚航  
青嶂連天迴  
丹楓向日明  
草橋人不渡  
萬事一絲輕

七言絕句

和葉省菴太守與百歲林翁

一闌紅塵小隊通使君高挹白頭翁莫言此老偏霜寵  
百里春風處處融

題馬石渚所藏梅道人墨竹卷

道人寫竹一尺強遠勢矯矯凌風翔乾坤一氣自完足  
底事寒梢萬丈長

題九霄墨菊

近來好事徧搜奇籬落秋光千萬枝尚有仙家長品在  
天香未許世人知

題九霄深紅菊

幾朵深紅籬畔栽幽香剛對一尊開江村秋色涼如水  
五柳先生歸去來

筆峰相送別時口占

筆峰送客到康家出海朧朧月有華歸去柴門吠山犬  
竹園亂踏影交加

東馬師山

歸來偈仄歎無廬近借山房一榻居面勢不知多少潤  
碧天萬里一塵無

自斲雲根結草廬瀟然便號白雲居翠峰亭子花光合  
鬧市風塵定有無

已放天風掃草廬高虛偏稱道人居莫言天馬民貧甚  
豆粥藜羹有底無

題西渠水亭

高柳陰濃半掩扉  
平田水滿鷺交飛  
小江風物堪圖畫  
落日漁舟蕩槳歸

矮作垣墻小結廬  
一泓春碧湛西渠  
花間醉喚客嘗酒  
竹裏卧聽兒讀書

月上潮生風自來  
主人愛客清尊開  
漫遊信脚渾無定  
打話高亭更此迴

瀟灑前村玉萬竿  
冥冥江色暮雲寒  
偶然風擺高枝亞  
盡露天南百尺山



甲辰歲大飢莆中民風八首

二麥無秋稌黍空  
早田愁旱晚愁風  
今年氣候何乖舛  
百種天災四處同

甌以生塵突不黔  
街頭斗粟貴於金  
村莊男女餘多少  
拆盡人間父母心

山中木實不知名  
聞道今年爛漫生  
老嫗盡攜孫與子  
悲歌直上白雲層

嫠婦歸啼不忍聞  
青天白日怨胡孫  
飢雛揉抱魂應斷

騰踏蒼煙古樹根

凍雨酸寒不作甘晚晴更自落  
耗耗採山此際知多少  
僵殺黃蘆葉底菴

到處山坳與水濱家家門戶蔽  
荆榛丁男盡出無雞犬  
風物蕭條愁殺人

旱氣深時疫氣生凶荒自古勢  
相成窮鄉卧病人人是  
落日空原無哭聲

暑雨和寒已怨咨號寒愁雨更  
啼飢老夫夜擁寒爐坐

細數簷聲悶詠詩

乙巳春夏間民飢更甚老農述此

年稔此際渾無賴麥病民間更不禁屈指榆花秋早晚  
澹煙荒草正春深

大麥焦枯小麥黃遺黎何處憇穹蒼人間度日長如歲  
可耐春添閏月長

歸燕飛飛海上村曉晴那復散雞豚楓林社日無香火  
風雨瀟瀟暮打門

五侯山下八壺前二月風光總可憐  
可是今朝一百六人家幾處斷炊烟

不記清明今日是暖風晴日草芊芊  
荒年流毒到枯骨兀兀墳頭無紙錢

夕陽芳草翳王孫底事淒涼不可聞  
怪殺豪家深避客邇來聯月不開門

冷煙恰受生柴葉饒口偏堪宿草芽  
曉露褰襦衣袂濕分明不為踏青來

金步尺八卷八  
莫為學仙能拔宅海翁多日已休糧火麻黑豆終煙火  
人世空傳不死方

野夫持男易斗粟低鬟舊衲破裙紅生男不如生女好  
愁殺杜陵頭白翁

餓夫不受嗟來食慙愧當時食者心一叱裂衣甘餓死  
古來溝壑有知音

歡情舊事空回首死別生離愁奈何多少鄰姬隨賈客  
瘦容枯眼淚痕多

年年簫鼓看划船  
士女如雲白苧鮮  
不見青青河畔草  
遺孩何處噪烏鳶

春來感事漫成

莆陽自古稱嘉地  
老死何曾餓殺人  
白日不堪風景惡  
青山誰計蠲饑春

去年五月亂紛紛  
惡少橫行動作羣  
賴得黃堂賢太守  
隱然威望壓江氛

南至夜宿橫山留題

寒宵一宿橫山下共話孤燈睡去遲風靜灘喧驚却夢  
忽疑溪雨到來時

題三洲章先生小景

海上丹山碧樹村依稀風景似桃源春深古路無來往  
負崦人家靜閉門

簇簇沙頭繫短篷招提深處暮聞鐘板橋不渡蒼苔滑  
泚泚江潭煙雨中

觀競渡和韻

壺公山下作端陽素舸歡呼鬪欲狂我亦臨流同吊古  
湘累骨冷已千霜

友人惠山中小詩謝之

疎屋高簷兩角垂山中新製倩誰為莫言軟熟無剛操  
試著龍山到耐吹

十摺還將一幅裁卷舒妙理轉堪猜輕羅小製偏疎散  
天馬山前歸去來

青鏡塵濛久未磨為渠索照口先呵自憐憔悴孤臣影



兩鬢秋來白較多

題與湖南應城易生

數口飄零寄海濱  
長途甚處是行津  
麥舟發付何容易  
未必今人異古人

題鄧旂山掌教獎勞軸

考德久崇欽世業  
掄材端合應時須  
典司風化寧卑秩  
教授蘇湖是巨儒

草堂前芙蓉正吐口占數絕為別


芙蓉花發暗柴門，幾日相看不出村。  
地遠清溪童更懶，自留盆水餉花根。

天付秋花一種奇，草堂清淡正相宜。  
三春桃李雖多態，曾是秋風幾度吹。

清霜一夜老蒹葭，牆角芙蓉漸著花。  
猶憶昔年江上看，西風吹夢客思家。

楚水吳山未了因，匆匆魂夢客邊身。  
拒霜已是何年種，剛得今朝作主人。

不耐清秋懷遠途  
草堂坐覺旅懷孤  
捲簾月上芙蓉影  
便是人間送別圖



天馬山房遺稿卷八